

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN HAJI MOHD FASIAH BIN HAJI MOHD FAKEH
(SABAK BERNAM)**

PERTANYAAN : BERTULIS

Y.B. TUAN HAJI MOHD FASIAH BIN HAJI MOHD FAKEH [SABAK BERNAM] minta **MENTERI KEWANGAN** menyatakan punca kejatuhan nilai ringgit di pasaran dan nyatakan langkah Kerajaan untuk menangani kejatuhan nilai ringgit secara berterusan dan seterusnya menstabilkan nilai ringgit di pasaran dunia serta nyatakan sejauh manakah kejatuhan nilai ringgit telah memberi kesan kepada ekonomi negara.

JAWAPAN

Tuan Yang di-Pertua,

1. Pada amnya, sebagai sebuah negara yang terbuka, Malaysia turut terjejas berikutan ketidaktentuan ekonomi global

termasuk kejatuhan nilai mata wang Ringgit Malaysia. Nilai mata wang ringgit telah menyusut sebanyak 18.6% pada tahun 2015. Penyusutan ini bukanlah suatu kes terpencil dan ianya didorong oleh faktor dalam dan luar negeri seperti yang turut dialami oleh mata wang negara serantau. Hakikatnya, 123 daripada 149 mata wang dunia yang lain turut mengalami penyusutan nilai berbanding dolar AS disebabkan oleh pengukuhan dolar AS. Seperti mana-mana sistem kadar pertukaran, volatiliti mata wang, termasuk ringgit adalah sesuatu yang mungkin berlaku, terutamanya dalam persekitaran global yang tidak menentu.

2. Namun begitu, trend penyusutan ini telah beralih arah pada tahun 2016. Sehingga 11 November 2016, ringgit menambah nilai sebanyak 0.3% berbanding dolar AS.

Tuan Yang di-Pertua,

3. Walaupun ringgit telah menambah nilai pada tahun 2016, ringgit telah mengalami penyusutan nilai sebanyak 16.7% sejak Januari 2015 sehingga Oktober 2016. Apabila nilai ringgit

menyusut, sebahagian sektor ekonomi akan menerima manfaat manakala sebahagian lagi terjejas. Pengeksport akan menerima manfaat dari segi hasil eksport yang lebih tinggi dalam nilai ringgit atau peningkatan dalam permintaan bagi barangan buatan Malaysia. Secara khususnya, penyusutan nilai ringgit akan memberi manfaat kepada eksport pembuatan Malaysia yang menyumbang sebanyak dua pertiga daripada jumlah eksport kasar.

4. Namun begitu, penyusutan nilai ringgit akan menyebabkan kenaikan kos import. Ini akan menyebabkan kesan langsung terhadap Indeks Harga Pengguna (IHP) kerana harga barangan yang diimport secara terus dari luar negeri akan menjadi lebih mahal. Walau bagaimanapun, kesannya terhadap kadar inflasi diimbangi oleh sumbangan kecil (6.4%) wajaran barangan import tidak termasuk petrol dan diesel daripada jumlah keseluruhan. Kesan penyusutan nilai ringgit ke atas harga petrol dan diesel telah diimbangi keseluruhannya oleh kejatuhan harga minyak global yang lebih besar.

5. Selain itu, penyusutan nilai ringgit juga boleh menyebabkan

kenaikan kos pengeluaranberikutan kenaikan harga bahan mentah yang diimport. Walau bagaimanapun, kesan ini akan diserap oleh harga bahan mentah yang lebih rendah susulan kejatuhan harga komoditi global. Harga komoditi global telah turun sebanyak 42% sejak September 2014. Oleh itu, kesan bersih ke atas kos pengeluar adalah terkawal, dengan penurunan Indek Harga Pengeluar (IHPR) sebanyak 8.6% pada tempoh yang sama.

6. Sehubungan itu, Kerajaan telah mengambil pelbagai langkah untuk mengukuhkan nilai ringgit. Ketidaktentuan yang berlarutan dalam persekitaran ekonomi global memberi kesan kepada kadar pertukaran mata wang. Dalam menangani volatiliti nilai ringgit dalam jangka masa pendek, Bank Negara Malaysia (BNM) menjalankan intervensi dua hala dalam pasaran pertukaran asing untuk mengawal tekanan aliran modal. Usaha-usaha juga dilaksanakan bagi membangun dan memperdalam pasaran pertukaran asing dalam negeri dari segi saiz dan instrumen bagi membolehkan industri dan peniaga tempatan mengurus risiko terhadap volatiliti mata wang. Dalam jangka masa panjang pula, nilai ringgit didorong oleh kekuatan asas ekonomi negara. Dalam hal ini, usaha untuk

mentransformasikan ekonomi termasuk mempelbagaikan sumber pertumbuhan, pembaharuan fiskal dan langkah untuk memastikan sistem kewangan yang kukuh dan stabil akan dapat memberi sokongan ke arah pengukuhan nilai ringgit.

Tuan Yang di-Pertua,

7. Walaupun usaha-usaha Kerajaan dalam mengukuhkan nilai ringgit telah membuahkan hasil, namun adalah penting untuk diketahui bahawa sebagai sebuah ekonomi terbuka, negara kita terdedah kepada ketidaktentuan ekonomi global, termasuklah ketidakpastian dasar monetari ekonomi maju dan tren harga minyak mentah global. Perkara ini menyebabkan sentimen pelabur boleh beralih arah di masa hadapan dan akan menyebabkan volatiliti dalam kadar pertukaran ringgit. Sungguhpun demikian, kesan ini dijangka memberi impak yang tidak ketara kepada negara kita memandangkan struktur ekonomi yang kini lebih pelbagai serta disokong oleh asas ekonomi yang meluas, kekukuhan daya tahan dan peningkatan daya saing.

8. Sehubungan itu, dalam jangka masa panjang, prestasi nilai ringgit didorong terutamanya oleh kekuatan asas ekonomi negara yang terus mapan. Justeru, Kerajaan sentiasa mengambil langkah pengurusan makroekonomi yang pragmatik bagi mengekalkan momentum pertumbuhan ekonomi negara. Dalam hal ini, usaha untuk mentransformasikan ekonomi termasuk mempelbagaikan sumber pertumbuhan, pembaharuan fiskal dan langkah untuk memastikan sistem kewangan yang kukuh dan stabil akan memberi sokongan ke arah pengukuhan nilai ringgit.